

Gen 15,1-6



Abrão

Fulan ida ne'e, ita-nia Lectio sei diferente uitoan: iha programa hakerek katak iha tempu ida ne'e ita sei hakle'an Abrão, nu'udar modelu fiar nian. Iha 29 juñu, Amo Papa Francisco I, publika Surat Ensiklika "Lumen Fidei" (Fiar nia roman) ne'ebé kompleta buat ne'ebé Amo Papa Bentu XVI prepara ona, iha ne'ebé nia ko'alia mós kona-ba Abrão; tan ne'e, iha parte "Meditatio" nian, ita sei tuir Amo Papa nia reflesaun.

Ita hahú ita-nia reflesaun hodi husu Espíritu Santu nia tulun

INTRODUSAUN

Ita rona beibeik ko'alia kona-ba Abrão, maibé nia se loos? Hebreu sira, sarani sira no islam sira hateke ba nia nu'udar modelu fiar na'in ida nian. Nia ema lemo-rai, ne'ebé moris iha Mesopotamia iha Ur (tan ne'e la'ós ema hebreu ida), hafoin, tanba buka fatin di'ak ba ninia bibi sira, nia ba hela iha Haran, hafoin Maromak bolu nia atu ba rai Canaan, rai ne'ebé Maromak rasik hatudu ba nia.

Espíritu Santu, ami-nia klamar nia bainaka,
haraik Ita-nia roman mai ami,
atu ami bele komprende Ita-nia lialoos.
Halo ami konxiente katak Ita moris iha ami leet,
maibé, liuliu, tulun ami atu reflète no reza ho laran manas
hodi haraik Ita-nia karidade mai ami.

Lee hakmatek: Gen 15,1-6

Iha loron hirak neebá, Na'i lia tun ba Abrão, husi mehi ida dehan: "Abrão, ó keta ta'uk: Ha'u mak ó-nia kbiit; ó-nia kolen sei sai boot tebetes". Abrão hatán ba Na'i: "Na'i, ha'u-nia Maromak, Ita sei haraik sa ida mai ha'u? Ha'u atu mate, maibé, ha'u la husik oan ida, ida ne'ebé sei hela iha ha'u-nia uma mak Elíezer husi Damasco". Abrão hateten tan: "Ita la haraik oan mai ha'u, tan ne'e ha'u-nia atan mak sei simu ha'u-nia riku-soin; hodi hela nu'udar oan". Nune'e, Na'i lia tun ba Abrão dehan: "Ó-nia atan sei la hela ho ó-nia riku-soin; ema ne'ebé sei moris husi ó-nia raan mak sei simu hodi hela ho ó-nia riku-soin". Maromak hasai Abrão husi nia uma, hodi dehan ba nia: "Foti matan ba lalehan, ó bele karik, sura to'ok fitun sira iha ne'ebá". Maromak dehan tan: "Ó-nia bei-oan sira sei sai barak hanesan ne'ebá". Abrão fiar iha Na'i Maromak, hodi fiar ne'e, Na'i halo nia sai santo.

LECTIO

Abrão nia istória hahú iha kap. 12 livru Genesis nian ho ninia vokasaun; iha kapitula ida ne'ebá Maromak halo ona promesa ida ba Abrão, nu'udar motivasaun atu nia ba rai seluk. Abrão la husu esplikaun no halo tuir kedas buat ne'ebé Maromak promete. Maibé liu tiha akontesimentu barak (ne'ebé Genesis haktuir iha kap. 12 to'o 14), Abrão seidaunk haree buat ida... tan ne'e, ita bele komprende tansa, iha pasajen ida ne'e, Abrão parese satiadu uitoan bainhira Maromak ko'alia kona-ba ninia kolen. Maibé diálogo ida ne'e hatudu mós Abrão nia konfiansa boot iha Na'i, tanba, maski seidaunk haree buat ruma, nia kontinua fiar.

MEDITATIO

Ita kontinua ita-nia reflesaun liuhusi Amo Papa Francisco nia liafuan sira


- ♣ Fatin partikulár pertense ba Abrão, ita-nia aman iha fiar. Iha nia moris mosu buat ruma ne'ebé oin seluk liu: Maromak ható'o ninia Liafuan, Nia hatudu An nu'udar Maromak ida ne'ebé ko'alia no bolu Abrão ho ninia naran. Fiar kesi an ba atitude rona nian. Abrão la haree Maromak, maibé nia rona Na'i nia lian.... fiar mak resposta ba Liafuan ida ne'ebé interpela ema ida-idak, fiar mak resposta ba Ita ida ne'ebé bolu ita ho ita-nia naran rasik.
- ♣ Buat ne'ebé Liafuan ida ne'e ható'o ba Abrão konsiste iha bolun ida no promesa ida. Uluk nanain mak bolun atu sai husi ninia rai, konvite atu loke an ba moris foun ida, hahú "ezodu" ida ne'ebé halo Abrão la'o ba hasoru futuru ida ne'ebé nia la hein... fiar "haree" se la'o, se tama iha espasu nakloke ba Maromak nia Futar Lia. Liafuan ida ne'e lori mós promesa ida: "Ó nia bei oan sira sei sai barak"; Abrão nia fiar sei "atu memoria nian" nafatin... Tanba memoria promesa ida nian, nia biban atu loke ba futuru, atu leno ain-hakat tuir dalan. Tan ne'e, fiar la'o hamutuk ho esperansa.
- ♣ Maromak husu ba Abrão atu entrega an ba Liafuan ida ne'e. Fiar komprende katak bainhira Maromak laran metin ko'alia liafuan ida, realidade ida ne'ebé liu lala'is, iha Maromak niaibun sai buat ruma ne'ebé sei la monu, sei la iha buat ida ne'ebé metin liu fali nia. Fiar simu Liafuan ida ne'e nu'udar fatuk segura ida iha ne'ebé bele hari'i ho fundamentu metin. Tan ne'e, Biblia uza ba fiar liafuan hebraika *emûnah*, ne'ebé mai husi verbu *amàn*, ne'ebé iha ninia abut signifika "suporta". Liafuan *emûnah*, bele uza ba Maromak nia fidelidade no mós ba ema nia fiar. Ema fiel hetan ninia kbiit hodi entrega nia an iha Maromak fiel nia liman... S. Agostinho sei esplika hanesan ne'e: "Ema fiel mak ema ida ne'ebé fiar ba Maromak ne'ebé promete; Maromak fiel mak Ida ne'ebé haraik buat ne'ebé promete ba ema".
- ♣ Abrão nia istória nia aspetu ikus mak importante atu komprende ninia fiar. Maromak nia Futar Lia, maski lori novidade no halo ema hakfodak, la'ós buat ruma ne'ebé oin seluk ho Patriarka Abrão nia esperiênsia. Iha lian ne'ebé ko'alia ba nia, Abrão rekoñese bolun kle'an ida, ne'ebé hori uluk kedas hakerek iha ninia fuan.... Maromak ida ne'e, ne'ebé husu ba Abrão atu entrega nia an tomak ba Nia, hatudu An nu'udar moris nia Hun. Nune'e, fiar iha relasaun ho Maromak nia Paternidade, husi ne'ebé kriaun mosu: Maromak ne'ebé bolu Abrão mak Maromak kriador, Ida ne'ebé halo "sasán hotu moris mai" (Kf Rm 4, 17)... Ba Abrão, fiar iha Maromak leno ninia moris nia hun, halo nia rekoñese bee-matan laran-di'ak nian ne'ebé hahú sasán hotu, no hametin nia iha konviksaun katak ninia moris la ba oin nar-naran de'it, maibé tuir bolun ida no domin pesoál ida.



*Iha ita-nia moris mak
Jezús hakarak tama ho
ninia Liafuan, ho ninia
Prezensa. Halo favór,
husik atu Kristu no
ninia Liafuan tama iha
imi-nia moris, bele
natubu no sai boot!
(Amo Papa Francisco I)*

ORATIO

Hanesan S. Paulo dehan:
Abrão mak ita-nia aman
nian. Ita mós presiza sai
"aman" no modelu fiar nian
ba oratorianu sira. Koko atu
hanoin ba Abrão nia moris
no akontesimentu sira
ne'ebé marka ninia moris,
no koko atu halo orasaun
ida, hodi husu tulun ba
Maromak atu hametin ó-nia
fiar.



ACTIO

"Belun doben sira, imi keta haluha katak imi
mak kampu fiar nian! Imi mak atleta Kristu
nian! Imi mak konstrutór Kreda ida furak
liután no mundu ida di'ak liután. Ita foti matan
ba Na'i-Feto. Nia tulun ita atu tuir Jezús, fó
mai ita ezemplu ho ninia «sin» ba Maromak".

Amo Papa Francisco nia liafuan sira ne'e mak
dezafiu boot ba animadór ida: ida-idak bele
hanoin saida mak Maromak husu ba nia, ha
momentu ida ne'e, atu bele sai kampu fiar
nian no konstrutór Kreda nian.